

四庫全書

集部

欽定四庫全書

集部

清容居士集卷十五
七

詳校官庶吉士臣張溥

侍讀臣孫球覆勘

總校官降調編修臣聖脉

校對官待詔臣胡士震

謄錄監生臣王路

欽定四庫全書

清客居士集卷十五

元 袁桷 撰

開平第一集

甲寅

延祐改元五月三日分院十五日始達開平得詩數

篇錄示兒曹

居庸關

太行領羣山萬馬高下拜平蠻轉城隍隱隱南北界危

坡互交牙寒溜寫泚泚陰風玄虬湧巨石忽崩壞周遭
青松根下有古木砦石皮散青銅云是舊戰鎧天險不
足憑歷劫有成敗驅車上林杪出日浴光怪肅肅空巖
秋天風迅行邁

雨中度南口

山寒絕禽鳥獨聞子規啼石壁飛雨驟衆木搖淒淒瘦
馬蹴亂石高下齧其蹄陟嶮沮洳深漸覺所歷低暝色
起亭午土屋流寒泥須臾過雷聲倏忽生晴霓水清亦

可渡戒僕踰前溪

重午日宿南口小店

寒雨鳴石峽蕭蕭五月秋
道逢采藥人不識葵與榴
氣清諧令節暑溽想南州
涼颼木末來動色思重裘
猶持一卮酒慰彼湘纍愁

桑乾嶺

漠漠天都近天梯爾許長
青帘矗山影烏帽拂雲光
行客穿珠曲居人綴蜜房
端窮萬里目那識九迴腸

渡懷來沙嶺

沙清圓石瘦千里聞風聲驅此轂轅車索索莎鷄鳴遠
山列翠席近坡環碧城高下各有險轍跡那由平驚兔
導我前歷碌為之驚天低雲搖蕩土廣塵縱橫謬膺翰
墨選遠行有期程回頭望南坂初月隨風生

草地

帶水殘沙似暗潮平坡軟草綠迢迢不須回首更南望
下馬同兒摘地椒

龍門

瀚海雙龍鐵鱗甲捲壑擎雲蹲冀闕千泉百道湊東南
急雨翻空迸晴雪古言神禹功最多導山鑿石疏九河
幽都之地不復顧乃使雙龍下地成盤渦陰風何颼颼
磅礴太古秋崩岸落車礮怪木森戈矛碎沙晴日鋪金
甃云是昔日當關挽勁之僕姑寒泉組練結九曲亭午
赫日光模糊車聲何鑾鑾昨宵急水迷無津垂堂之言
猶在耳游子商人行不已子規徹天呼我歸翠華北幸

那得辭龍門之石高不磨泚筆書我龍門歌

彈琴峽

在居庸

寒泉飛玉峽誰彈使成聲下有戰士骨鳴咽水中鳴絲
石本異調摩戛生虧成鑿迹非神禹佳兵構秦嬴駐馬
為聽之逝者何不平虛牝納新雨急促濁復清重華初
省方百神靜相迎為作薰風弦散彼巖下情

雲州

天濶雲中郡剛風起沈寥
瓊房聯澗曲土屋覆山椒
撞

布朝朝市通薪戶戶燒遙看塵起處深羨霍嫖姚

次韻虞伯生題祝丹陽道士摹九歌圖

玉眸精佇朝玉皇五采萬物迎初陽神君空洞光茫茫
瑤席合奏樂未央沉幾經綸白為章寸膚帝青下填阬
朝挾朱鳥招八方旋輪風轉盪金剛君山之峯隄可望
玉女鼓瑟哀不傷世職玄籍元運昌靈壽給扶顏色蒼
賜齡金篋難度量仲氏之道誰為長深根抱一真有常
下憫濁世生復亡浴精昧谷暵扶桑寥陽昭德森九芒

亘刳永寶天地光安流舒舒復湯湯儼思白璧謝汝將
歷險有戒毋垂堂乘狸從豹何陸梁菰蒲粒粒管張
積變不化遊益荒屈子調苦心忠良歌罷雲遏投靈湘
簫巫鼓胥紛莫詳嚴嚴祝史遺鉛黃握管用九神歸藏
出入森衛視錦囊

伏日書懷二首

伏日急雨來端坐披重裘中天異寒暑茲維帝王州碧
草記初夏堅冰在餘溝野曠無留禽積潦不復收飛雲

屢晴陰蒼莽天宇秋營營壁間蠅就暖旬日謀玄冥自成歲高下各有求悵彼南飛雁素心愧難酬

二

晨起萬竈煙墨雲何輪困念昔種松者用志良苦辛寒沙草漫漫萬騎來無津樹之似雲柵積雪迷秋春車大棟復楹小車楨與薪空餘千歲脂成此官路塵我衣素修潔暫汙不敢嗔俛焉拾餘煤作書記其因

題李士弘學士畫明復齋風竹

虛聲出素壁冷冷天地秋矧此三伏涼居然索重裘盪
摩神光旋憂擊元露浮浩蕩白玉京頃刻瀟湘洲昂昂
負嶠仙筆底寒飈飈高齋襲道氣深根淡無求

慈雲堂

周南翁祖母

萬竹鳳岡下虛堂聳翠微隔林聽返哺前嶺望孤飛山
立斑斕服牛眠錦繡圍諸孫有遺範致樂報春暉

南翁
近禁

致樂堂
奉母

送濯伯玉之官雲南

蕩蕩哀牢國耕桑換不毛官船乘驛穩銅鼓報衙高
事簡歸王化民淳汰吏曹端知清淨理山水縱遊遨

次韻玉堂畫壁

至人悟窮達斂跡寓壟畝良苗貴深扶掘土戒蒿蕒
靄靄新陽浮高下接紫宙跨犢東南行問事一俯首
新雨瀉溝塍交流媚川後輟耕非素心帝命資左右
相彼前山雲倏迷復還岫卷舒樂槃澗署壁寫其舊
清秋映空谷風雨百神守夙昔經濟姿志不在盃酒
要使風俗淳

斯民樂仁壽

秋谷耕雲

明月入水底摩盪空江雪昂昂垂綸翁在雪不在月悟

彼玄化理不寐坐明發我舟非無槳我車詎無軌迂儒

守繩樞世胄貫華閥願以千尺竿裁為濟川筏

寒江釣雲

再次韻

粵商有阿衡肥遁樂畎畝深耕力其勤嘉穀寧有秀時
來起丘園勛業冠宇宙持此金石心黽勉佐元首維敬
在一德維訓守先後高風邈難追白雲在前岫堂堂匡

濟功匪以夙昔舊譬彼執御人先道謹為右精忠百壬
避正色九關守我昔夢見之再拜酬卮酒容谷秋思深
圖之奉千壽

維昔師尚父垂老鬚眉雪突兀江海姿韜精忘歲月坐
石投其竿秘籥時一發載車與之歸在德不在軛念昔
經濟人事定始功閱寒江眇風濤乘桴可知筏

上都客舍王弘為作風竹

門巷泥深笑獨清此君瀟洒未忘情無端昨夜風花急

却送秋聲作雨聲

金主畫孟浩然騎驢圖

生前明主已遭嗔
身後君王為寫真
家國總緣詩句廢
灞陵猶勝蔡州塵

二

木葉山前雪似銀
軟裘難作自由身
想因歲晚朝陵後
故寫騎驢處士真

三

北闕明言不上書
蹇驢何自入西都
開元天子元無分
留與他生作畫圖

李陵臺

天盡穹空計未踈
囊封朝奏似憐渠
漢家天子春秋責
從此降臣直筆書

二

雪衮寒沙風衮灰
眼穿猶上望鄉臺
隴西可是無回雁
不寄平安一字來

上都揚節婦

吹徹玉參差孤鸞天外飛
匣藏身後劍篋寶嫁時衣
壽樂龐眉聳心清鶴骨肥
諸郎新玉立孝謹報春暉

開平第二集

登候臺

蜿蜒西龍岡綠草搖晴波
旁有雙玉井石角增嵯峨
明良佐神運目力窮坡陀
層垣睥睨雄寶構通義娥
昂昂鐵竿聳飛鳥光盪摩
土屋粘蜜房文氍圍錦窠
緬思皇

猷遠嘿止松林戈匪以清暑遊跋履勞鳴珂陰森晚歲
晦寒沙聚羣駝悲笳月初上戴斗瞻天河

次韻伯宗同行至上都

遊塵捲飛蓬積水翻驚波羣山擁雙闕勇勢凌岷峨藉
草各小憩側身復登陀纖峰修眉聳佇立愁湘娥仰視
北斗光燿燿疑肩摩田父指我言昔日搜鵬窠吾皇罷
畢弋射乂生投戈二客何舒遲直可鳴朝珂銀鬕傳綠
蟻翠釜登紫駝出處愧我異愛君筆懸河

再次韻答李彥方應舉

良會難自陳歲月流頽波念昔邂逅初黑髮雲冠嵒羣
公擅碑板雄文記頭陀于時接英武奉身如素娥粲粲
白玉署墨沼爭漸摩所思筆成塚不計印積窠君時皎
冰霜正色羞倒戈習隱吏金馬弔古師銅駝瞬息已廿
載愧彼桑乾河

伯宗再次韻復叙舊

玉署日倒影綺窓水迴波堂前雙樹琪暑清綠雲栽君

時坐其下涼漪起陀陀悲商激湘纍急羽凌韓娥執簡
諒且直惜日勤編摩盛世昭休明卑枝鳥爭窠掀髯紀
其端刻佞侔鉛戈占風驗靈烏聽水悲老駝俯仰各努
力解佩投于河

伯宗遊華嚴寺次韻二首

平蕪寒磧際突兀梵宮尊白日開金地青蓮擁紺園城
低千障擁塔靜一鈴喧夙昔莊嚴果無言急掩軒

二

欲問生公法年深不上堂
斷雲成密澍深樹當疎簾
十地三乘要諸天百和香
玄機我素解何日勘禪房

上京襍詠

雲護中街日風開北戶天
千溝凝白雪萬竈起青烟
午溽曾持扇朝寒却衣綿
松林空有界剪伐不知年

二

土屋層層綠沙坡簇簇黃
馬鳴知炮急雁過識天涼
墨菊清秋色金蓮細雨香
內園通閤苑千樹壓羣芳

三

天闕虛無裏城低納遠山白榆迷雁塞青草補龍灣市
簇家家近官清日日閒重遊深問俗漸恨鬢毛斑

四

舊歲寒冬惡霏霏土雨迷門荒懸馬革草淨絕牛蹄列
帳烟光慘空營月色低縣官捐粟帛歲晚得扶攜

五

上國饒為客天涼眼倍青白魚沙際網黃鼠草間翎芍

藥園紅斗麻姑綴玉釘漸知塵骨換振佩接青冥

六

天錫清涼國晴霞綻雪峰月低疑墮兔雲近得攀龍寶
鑑頒冰撒筠籠賜果封白頭貂帽客為我話深冬

七

駝鼓村村應傳更趨進程草肥涼露白樹薄曉風清帳
殿橫金屋毳房簇錦城屬車流水度細點侍臣名

八

伏日瓊林宴名王總內朝帽尖花壓翠衣角錦團貂炙
熟牛酥芼醅深馬乳澆柘枝旋舞急宛轉稱纖腰

九

市狹難馳馬塵深易沒車凍蠅爭日聚新燕掠風斜晚
汲喧沙井晨炊斷木槎閭閻通茗酪俗簡未全奢

十

長夏崇真館疎簾酒靜便支頤推萬古心息契重玄月
窟窓如雪天瓢酒似泉主人憐老客下榻不曾懸

再次韻

帝京環陸海平野接冰天龍吐青林火狼沉紫塞烟風
花秋黯淡雲葉雨連綿昔日君臣意深符卜洛年

二

寶閣凌空涌金壺映日黃梵音通朔漠法曲廣伊涼御
榻惟經帙宮爐獨篆香吾皇清淨德銀管願垂芳

三

高下雲中樹踈明雪外山坡凹茅結屋嶺轉水回灣禁

路分馳道沙場當內閑通明風露冷時許侍清班

四

晨起儀臺立烟青望眼迷草低鷹側目車逼馬迴蹄風
勁弓絃直泥融柱礎低蚊蠅深斂跡塵尾不須攜

五

紫極中天正森森接帝青雁歸傳帛信雉落舞紅翎寶
所金千頃朱門帶萬釘瀛洲清淺處高坐納空冥

六

昔年曾扈蹕宿直對鼇峰錦掣蘭苔翠波翻墨沼龍起
居青簡注除拜紫泥封共說先皇日千官總住冬

七

土驛高低置蒼茫七日程馬通分熠燿牛酪注深清殘
雪明珠闕繁星列火城前山黃白處草藥不知名

八

千堞蜂腰凸羣山馬首朝沙場調俊鶻草窟射豐貂閑
舞花頻簇狂歌酒恣澆今年春事減土舍雪齊腰

九

箭落驚遊騎，翎傳督運車。
土風殊楚越，驛道倣褒斜。
細雨三更枕，清秋八月槎。
夜聽繁管急，漸習五陵奢。

十

長齋孤館靜，捧腹睡便便。
酒斷眸凝碧，塵深鬢返玄。
凍蜂粘暖草，乳雁啄冰泉。
過翼時頻數，鄉心日夜懸。

李陵臺次韻李彥方應奉

前坡聳頽基，云是望鄉臺。
往事已歷歷，亂石何嵬嵬。
想

此二子別袂結不能開河梁白日速朔風來沙堆漢法
重失律輕生表奇才一跌不能返歎歎壯心摧形影胡
越分骨肉參商乖萬事已瓦解誰能寫余哀昂昂司馬
生義色與壯懷子卿固偉節屬國何低徊褒功實謫淺
議刑良刻哉坐令衛律輩歲望邊城來

次韻李齊卿呈閒閒嗣師

清都逼紫微瑤光流玉壇陰厓太古雪伏日生午寒澄
懷集遐思黑髮竹皮冠玄關轉輕雷銀潢激層瀾取彼

白石詞寄以朱絲彈一彈去日短再彈行路難兩躍疾
飛隼歸雲生樹端遠遊感夙昔努力慎風餐

西京李齊卿讀所贈吳公詩愛之遂次其韻

溫溫紫玉姿揚休升觚壇維時夜氣肅璇璣動芒寒辟
公閱多士謂宜錫玄冠環水赴文海俾爾揚清瀾東南
有高樓繁吹和急彈我獨念子意希聲世知難遺情寄
寥廓冥鷹渺雲端去住靡所止精思勿忘餐

伏日

伏日陰陰九月天雲邊桂露十分鮮侍臣已入清涼境
不到凌虛未是仙

二

偷桃曼倩語言尖伏日歸來割肉廉那似蓬萊風露冷
重裘端坐絕趨炎

松林行

陰陰松林八百里昔日傳言為界址玄雲捲甲天馬來
雪兔霜狐先委靡山前犬牙十六州石郎屈膝輕相投

淺沙圓石古轍迹草青草枯無盡愁

闕

拂天鎮南北

萬井燃松烟似墨大車

闕

龍角全小車輪困束矛戟

松花落子芽復抽不如昔日當道稠採薪之人不辭

闕

出

郭十里爭相酬君不聞雪山之西銅柱南混同鴨綠成

東漸金山橐駝爭貢寶剪取平林作馳道

採摩姑

官山摩姑天下無迸石菌蠹攢寶珠阿香執御雲中驅
天瓢急注爭葩萼玉京高門散金鋪剩欲點綴完無膚

萬釘寶帶山澤癯圓如佛螺綴頭顱累如秬黍連二稂
羶根未許相糗糊鄭泉石鼎鳴笙竽急投小烹養甘腴
上池三咽生醍醐五芝高著神農書吾欲比之議匪迂
天花代北嚴貢輸永言定論兄弟俱

尚尊賜張上卿薛玄卿賦詩次韻

龜眸鶴骨煉純陽言合靈著行有常黼坐近瞻堯日月
屬車遠度漢封疆英雲玉佩開仙府湛露瓊卮出尚方
可怪相如多病渴願分金掌接恩光

再次韻

居庸曉次日初陽肅肅龍旗出奉常獸殿頻趨恩有秩
鵲爐深祝壽無疆冰壺酒滑通真一雲閣香清接上方
靜夜屢陪談麈樂燈搖寒燼日搖光

復成二篇

羞逐羣芳度艷陽丰神弘景筆元常氣雄轉旆攻秦壁
色正登壇復魯疆易玩天皇遊太古書看王會補殊方
平生物論深涇渭寶鑑懸空背透光

二

孤鳳清聲出嶧陽
沖天采羽越尋常
清心常侍真醫國
束髮從師屢出疆
明月乘鸞通碧落
空江瘞鶴憶朱方
詩囊取次傾珠琲
一一清圓敵夜光

西京任庭瑞樂善齋

大鈞妙無心變化各有職
元陽執樞紐羣動遂生息
達人洞顯幽語默絕窺測
尸居碧窓曉觀萬養真
寂春葩陽林秀衆采紛
薺薺上有黃鸝鳴下有遊鹿迹
嗒然遺

世情至道在几席芝眉紫綸巾舉酒起玉色桐孫護清
風竹母引白石素心絕榮侈天爵曼有得敦龐古遺民
過里車已式願言表其閭庶以昭帝則

白雲閒齋

武當靈峰通廓寥下有白雲護山腰朝入寢扉結翠被
暮宿丹井騰金瓢神君握機不盈寸頃刻倒影旌幢飄
道人夙昔慣所見更上岵嶢挾斗杓

送金華王生

不到金華洞于今二紀餘偶逢騎鶴客為覓牧羊書芸
笈秋消蠹萱堂暮饌魚江湖易衰感暫且問樵漁

建昌李生城南別墅

雲樹黑微茫依稀見竹房山空遼鶴化市近海鷗藏逸
興王官谷幽禪華子岡展圖塵眼瞇剩欲濯滄浪

開平第三集

辛酉

至治元年二月庚戌至京城壬子入禮闈考進士三
月甲戌朔入集賢院供職四月甲子扈蹕開平與東

平王繼學待制陳景仁都事同行不任鞍馬八日始
達留開平一百有五日繼學同邸八月甲寅還大都
得詩凡六十二首道途良勞心思彫落姑錄以記出
處耳是歲八月袁桷序

次韻繼學途中竹枝詞

居庸夾山僧屋多鑿石化作金彌陀但有行車度流水
不見舉拂談懸河

二

紅袍旋風漾金泥車前把酒長跪齊忽聽琵琶相思曲
迎郎北來背面啼

三

氍毹房錦幄花簇勻酥凝疊餅生玉塵晚傳宮壺檀板急
酒轉一巡先吐茵

四

土屋苔草成廬廡前床翁媼後小姑我郎南來得小婦
蘆笛聲聲吹鷓鴣

五

雲州山如五朶雲老松積鐵
靄青春遂令古雪不肯化
萬杵千爐煎貢銀

六

山後天寒不識花家家高晒芍藥芽
南客初來未諳俗
下馬入門猶索茶

七

寒風捲蓬沙轉黃駐馬問路路轉長
紅衣簇簇入新市

指點爐頭稱上方

八

朔雲蕩蕩愁燭龍土房擁被睡高春披衣上馬過前驛
清霜急雪時相逢

九

瀛洲往歲侍宸居一度還家一度疎近行開平十二驛
眼望南雁傳鄉書

十

闔闔雲低接紫宮
水精涼殿起薰風
侍臣一曲無懷操
能使八方歌會同

四月二十六日曉霜

遠坡殘月露零零
曉壓椒花玉作屏
他年若問南州說
疑是鄒生逞怪靈

戲題樺皮

褐裳新脫玉層層
紅葉朱蕉謝不能
擬製小冠韜短髮
意行雲水一枝藤

望雲州

望雲州裏松花白金閣山前木葉丹駐馬搖鞭遊不到
還家寫作畫圖看

次韻薛玄卿南還題驛二首

思君葉落見參旗碧眼微醺倍陸離
比上開平復南去却如返棹剡溪時

二

碧窓雲冷思淒淒曉搦黃庭眼未迷
宜向山陰道中住

聽風聽雨聽猿啼

次韻答陳明復

漢殿高懸五丈旗
羽人朝奏佩江離
綠章已徹蒲團坐
正是金門月上時

二

碧雲深處草淒淒
誰道桃源路已迷
昨夜紫霄峰頂坐
天鷄子夜鳥先啼

再次韻

行殿風高十二旗
碧雲深處紫流離
相如獻賦誰能繼
有客瀛洲獨立時

二

烟籠沙磧凍雲淒
錦簇椒花五色迷
不是朝天騎馬倦
寒鷄自怯曉鐘啼

次韻李伯宗學士途中述懷

山巍磧瘦馬逶迤
盡日雲陰變四時
曉渡桑乾雪新作
倚松參坐關題詩

二

李陵臺下日遲遲
惆悵河梁執別時
漢武不知歌四牡
千年競作五言詩

三

紫紆馳道屬車遲
白髮微臣際盛時
侍獵能追上林賦
登臺願繼栢梁詩

四

紫禁天低夏日遲
深紅芍藥勝春時
共仰雲孫李學士

樂府新填更進詩

五

內宴初筵舞尉遲榴花未吐艾花時宮詞久矣無王建
把筆爭傳應制詩

六

鼇峰土冷菊花遲滴滴金明八月時留取東平老學士
烹羊分韻酒催詩

端午謝吳閑閑惠酒

客裏端陽景物殊待晨分釀出偏壺松間尚積千年雪
澗底難尋九節蒲霏玉論陳醫國艾研硃手寫辟兵符
侍臣陡覺蓬萊近簇簇宮花徧蕊珠

榆林

白榆天上生北塞傳真種漢皇究邊略盛秋此為重神
武開帝京赤縣官曹擁井邑生聚繁折戟出耕壟考昔
所種榆禾黍日葦葦繁絃雜伎部一一承天寵盛衰諒
有時前山碧雲涌

龍虎臺

羣山朝宸居層臺納靈秀百泉暗東西千嶂明左右

沙磧

水多伏流

先皇雄畧深省方歲巡狩翠華懸中天問俗首耕

耨沉沉貔貅壘濯濯鷹犬數前行節駝鼓執御各在手
侍臣仰天威長跪四方奏往聞父老言羅拜上萬壽山
桃與黍酒啟齒時一嗅乘雲去無踪過者必稽首登坡
望儲胥紫氣徹牛斗

居庸關

扈蹕朝上京嚴裝戒修途首夏天宇肅寒雲慘不舒足
弱跨鞍窘喋喋詢前途縈紆入南口松籟吹笙竽在昔
恃險隘當關守千夫一朝天馬來巖崿成康衢大統叶
天運神武開皇謨信矣經啟功聿超神禹圖

桑乾嶺

茲山西北來旋轉十二雷昔人望鄉處生別何崔嵬我
來坐絕頂雲漢森昭回出日騰金鉦積露流銀臺長空
不受暑雪花散皚皚羶車引繩過屈曲腸九迴微踪愧

三至南望心低徊長風馬耳迅何當賦歸來

李老巖

層巒積明秀深崦梁愚園千松受新雨一一流珠璣少
憇倚絕厓清湍激林霏睡醒日亭午隔溪啼秘歸昔有山
水癖黽勉登王畿欣此澗谷幽亭亭白雲飛素懷倘自
喻出處諒無違

龍門

蒼厓出雙闕羣山頰首尊陰風起晴雷摩盪晝日昏鍊

峽擁偃仄百川為之奔疑下有龍湫逞怪蹲天門滄兮
出膚寸頃刻黃流渾側徑出石壁巨浸存遺痕緬昔設
天險事久難窮論征衣襲輕雨神君儼雲根

獨石

亂石各參布茲山以獨稱磅礴太素初星隕遺其形磊
落絕衆附昂昂耿晶熒此土積陰沍草木無光精疑有
華表人宴坐陳廢興前車何繩繩去馬何騰騰問之了
不應油然白雲興

晚發

蓐食慎王事曉星當前戶跨馬官道行細草泣寒露亂
石鳴琤琤啼鳥守荒樹行行未十里問堠坐當路年衰
脛力拘望遠彌窘步天風捲飛蓬白日互吞吐深知非
世才歸耕誓先墓

合門嶺

寒沙高岡聚積溜開土門地媼神功奇茲焉奉帝尊先
皇歲巡幸屬車爛華軒令嚴植前茅高下相攀援魚貫

別後殿蟻行定前屯飛丸落千尺瞥裂驚危轅履險深自
持人情戒居安寒雲蔽出日去去踰前村

赤城

茲山浴曉日墻壁流丹砂昔聞天台峰云受珠宮霞地
氣有南北變化無殊差埴墳登禹書頽壤勞民嗟感彼
山上松黑鐵留槎牙形色有正性染入徒增夸至今溫
泉下金鼎烹靈芽

灤河

近山馬昂髮遠山鳳騰羽百谷奔亂流屈曲長蛇赴維
時雨新過急溜槽床注居人匪為井千屨集沙步寒光
澄玉膏甘冽過牛乳茲泉成白溝巨浸合沮如蓮芡充
餽糧魚蝦足租賦塞翁話疇昔陋彼成險固往事不復
論沄沄日東去

次韻虞伯生墨竹畫壁

墨雲參差平地湧碧窓浙瀝寒風生截為崆峒白玉管
蟄龍夜嘯幽鳳鳴六月雪花飄上京崢嶸直與星斗平

出門忽作江海興推枕先聞金石聲

楊花曲

上都楊柳瘦且堅葉葉不展圓如錢年年飛花作端午
遠客乍見心茫然上都飄雪不知數此花與雪相旋舞
黃鸝聲絕孤雁鳴萬騎千車互來去手攀短條心欲絕
宛轉成毬恨初結寒風飛蓬捲車輪點點相亞隨明滅
南鄰蕩子衣夜單曉望出日如黃綿辛勤掇拾不敢棄
願刮龜毛同作氈

伯宗學士悉知鄙作唐律叙謝

我冠疎髮老詞臣筆底花飛點點春
千里關山勞夢寐百年泉石換精神
蕪城賦罷生新恨夔府詩成嘆絕塵
更有御園紅芍藥生香一曲柘枝新

四月廿一日與繼學同出健德門而伯庸以是
日入都城作詩寄之

二子出北門一客南門來燕鴻兩相避
矯首氣崔嵬客有百和香我有蒲萄盃
把盃客不見我心為之灰願留

百和香以待二子回

乞酒潘景梁學士

長夏蕭齋學晝眠
鰲峰深處酒如泉
山瓢從此通來往
準擬宮袍不上船

次韻繼學

急電散晴雲
仲夏天氣清
閉戶北窓坐
稍稍新月生
客至設棋局
言忘遺世情
盡日無王事
白雲與簷平

重午聯句

夏峰表奇雪天京候端陽寒襲宮羅輕瑞登水鏡光鳥
輪麗北陸龍舟競南湘蠅虎逞王國蜥蜴嚴帝房事訛
汚習陋風烈墟壤剛擁貂繫綵絲飛鞭賭瓊漿帶重公
莫舞簪飄艾如張雁分列瑤席魚貫登紫廊白乳謝角
黍青蒲截驚肪重離天門正習坎地軸方靈符瑩丹砂
羽箭穿白楊戀闕葵日傾懷家麥秋涼羹鴉傳大官懸
虎步天罡鳴噤百壬斂螽動九子昌截薛翠屏偃浩漕
白海長扇藏婕妤泣標聳飛廉忙紅苞當階藥碧縷雕

盤香宮花金抹額
廐仗玉鏤錫鈴催寶貼進拍奏霓裳
揚舉鼎凝脂膏載車寔餽餽蒲萄
潑灑瀉琵琶宛轉傷蟾蜍
闕未乖驕驕裘難藏伏日奩果貢薰風鑑水洋洋瀛洲畏獨往玉署思同翔

裝馬曲

綵絲絡頭百寶裝
猩血入纓火齊光
錫鈴交驅八風轉
東西夾翼雙龍岡
伏日翠裘不知重
珠帽齊肩顫金鳳
絳闕蔥龍旭日初
逐電迴光颺斗動
寶刀羽箭鳴玲瓏

雁翅却立朝重瞳沉沉按殿雲五色法曲初奏歌薰風
酏官庭前列千斛萬瓊蒲萄凝紫玉駝峰熊掌翠釜珍
碧實冰盤行陸續須臾玉卮黃帕覆寶訓傳宣爭頰首
黑河夜渡辛苦多畫戟雕闥總勛舊龍媒嘶風日將暮
宛轉琵琶前起舞鳴鞭靜蹕宮門閉長跪齊聲呼萬歲

嘉禾圖

土膏滲陽春連連垂黃雲仁聲九垓被地瑞昭人文穰
穰大同郡嘉穗表奇芬擢莖秀雙岐駢首誓不分稊聯

珠琲光苞簇綵綬紋老農善視之神化非耕耘維皇調
玉燭歲功合氤氲帝力畝畝深擊壤歌放勛圖成上金
匱寶軸森香芸侍臣丹筆工秉心述前聞願旅天子命
補亡追典墳

蘇武牧羊抱雛圖

寒氈齧盡節旄稀野曠風低短草肥忽見嬋娟新月上
却疑身似夢中歸

李仲賓墨竹圖

筆底玄雲冰雪姿雲洲玉佩映參差如何昔日閭中令
晚歲羞稱老畫師

開元恩長老以詩送北禪講師遊上京末章及
見余子灤陽次韻

乘槎親見玉繩流底用蒲萄與海榴紫塞接天星戴斗
白雲垂地水浮漚蠅頭可但窮三載麈尾懸知又九州
問訊開元老禪伯詩瓢今向太湖浮

王淡遊墨竹

陰陰密葉鐵鉤鎖淡淡疎柯水玉簪客向流離渾老盡
臨風題筆望江南

次韻繼學竹枝宛轉詞

長年久客學吳儂應對嫦娥認妾容聞道秋來三十日
雪花飄處似深冬

二

聞郎腰瘦寄當歸望盡天邊破鏡飛昨夜燈花圓似粟
倚門不肯送郎衣

三

宮羅疊雪撚金龍
即去香奩手自封
還家貂裘綿百結
教妾今年兩度縫

四

年年河鼓度天津
郎在灤陽見得真
今夕定知郎到日

桂花浮魄滿香輪

約八月十五日抵京

陳景仁都事以詩惠酒次韻

閉門擁雪絕知聞
壞壁行蝸古篆文
誰遣白衣傳剝啄

新詩如雪酒如雲

二

短髮藤冠似晉賢
瀛洲獨坐酒如泉
明知白眼輕餘子
客至題詩似屋椽

題贈翰林何生

殘月疎星送曉鐘
伊吾聲徹炯雙瞳
盛年事業須黃卷
盡日交遊謝碧筩
案上蟾蜍承夜露
門前叱撥立秋風
君家居士多陰德
佇看鷄翹列殿中

嗣天師墨戲四絕

橫塘野色深聳身對秋水守獨非自夸感彼蜻蛉子

右枯蓮孤鴛

守雌氣之母見一道之宗配合貴有得丹光結芙蓉

右枯蓮鴛鴦

二禽詎無知秋聲起天外蘆枝為我旌蓮葉為我蓋

右蘆荷水禽

高籟日惻惻水花淡無踪孤鴻招不來汎汎以自容

右蘆荷孤鳧

果老圖

御氣如嬰兒變化能成形再過趙州橋滅跡絕怪靈

清容居士集卷十五

欽定四庫全書

清容居士集卷十六

元素楠撰

開平第四集

壬戌

至治二年三月甲戌改除翰林直學士四月乙丑出
健德門買小車卧行八日至開平舍于崇真宮有旨
道士免扈從宮中闕無人聲車駕五月中旬始至書
詔簡絕僅為祝文十三道

已入
內制

悲愉感發一寓於詩

而同院亦寡侶和率意為題得一百篇閏五月上幸
五臺山以實錄未畢趣史院官屬咸還京是月丁巳
發癸亥還寓舍五月灤陽大寒閏月道中大暑觀是
詩者亦足知夫馳驅之為勞隱逸之為可慕也六月
丁卯朔叙

端午日縣車中抵開平客中三度端陽愴然有
懷

居庸昔日逢端午子規聲聲勸歸去舊歲灤陽萬壽宮

九節菖蒲泛瓊醕今年車中飽掀歎盲風北來雨如注
沙坡馬鬣高下迎土屋魚鱗先後附舊家松篁百尋碧
簷蔔花前石榴樹停車俛首不得語鄰牆簫聲雜駝鼓
勞生得意同蝸牛舊歷却行等蠅虎

崇真宮闕無一人經宗師丹房惟蒲苗楊柳感
舊有作

雙斛青蒲苗中庭綠楊枝門鎖碧窓寂徘徊心不怡辛
勤四十載逢辰構崇基寒日淡無華朔風助之悲想此

鷺鶴侶長嘯悟成虧往昔玉局翁言罷白雲隨懷賢感
夙昔悼念成涕洟夜夢忽邂逅掀髯歌紫芝

閒閒真人未至

崇真觀裏獨徘徊門鎖蛛絲燕子猜玄度來遲愁欲絕
為憑白鶴寄書催

舊歲端陽與王吏部同客灤陽因成七言奉寄
舊年同飲端陽酒擊鉢聯詩日未斜我戴夫須重出塞
君飄躑躅獨留家雪花帶雨催前馬草色連空趣後車

萬里功名頭竟白張騫何事苦垂槎

寓舍玄卿舊住今歸龍虎山書壁言懷

明珰出海見竒姿價壓連城賈客知
往歲曾為大鵬賦
今秋且作小山詞
黑頭好景傳杯樂
白眼長年按劍疑
君去我來同此榻
鴈回何處寫相思

五月八日雨霰

黑雲轉飛蓋晴空落珠丸
急響遞疎密跳踉杳無端
仰視烏輪光粲粲不可干
陰晴界南北咫尺分寒暄
鮫人

有暗淚乘陽湧冰瀾又疑天女下百琲隨輕紈采之不
滿把瞬息何彌漫東牆古楊枝含思碧雲寒留取宛轉
花伏日為君看

開平昔賢有詩片雲三尺雪一日四時天曲盡
其景遂用其語為十詩

茫茫廣漠區屈曲層城建昔云水雲陂伐木嚴築捷寒
沙雜軟草其下有冰片雙龍赴魏闕雲氣時隱見巍峩
中天居百里見行殿

唐皇極睿筭憂邊罷從軍種松八百里擘畫疆理分立
衆有定數後王策奇勲千車昂頭來萬竈生墨雲天險
尚莫恃人謀安足云

曉日出東門寒光靜相涵黑雲何方來玉妃為之驂頃
刻變昏晝陰晴常日三宸居逼衆緯熒煌斗司南世儒
寔六合鄒子成虛談

羲和當中街重裘慘顏色詢彼住冬人封戶雪踰尺松
煙暗踈箔羅坐圍丈席南鄰時相通北門恍未識冰天

與火井受地各有職

近山如雕鞍遠山如削鐵
涓涓落黃流嗚咽恨未雪
坡陀下前坂颯爽萬境滅
馬嘶不肯行沙寒草如茁
氈廬峙前岡一一望初月

駕鷲帖雲飛下懼鷹眼疾空
墟無鴉棲壞穴見鼠出楊
枝尚欽色吐絮朝伏日羌巴
雜蠻獠異服狀非一風土
諒不同刪述在史筆

煌煌千賈區奇貨耀出日
方言互欺詆粉澤變初質
開

張通茗酪談笑合膠漆憶昔關市寬崇墉積如銓梯航
際窮髮均輸乃踈術

城南水沮洳飲之不盈匕遠汲沙水甘客云汝縱恣客
竟遭河魚投以百金劑簞瓢乃真空飾情果為累狙公
解朝暮不復計三四

亭亭芍藥枝朱明勝春時金蓮與墨菊兄弟相等推陽
艷深摧藏後秀真竒姿盛時匪自棄願與松柏期有客
同爾心臨風結長思

燄燄三伏日沈沈九秋天雷鳴過牀下月出在樹巔手
持五采筆直侍虛皇前大以書龜圖小以傳瑤編綸言
廣聖澤載歌千萬年

南望

急霰輕雷五月邊舫船手把趣裝綿燕山南望十三驛
紅杏枝頭別有天

天鷲曲

天鷲頸瘦身重肥夜宿官蕩羣成圍蘆根唼唼水蒲滑

翅足蹇曳難輕飛參差旋地數百尺宛轉培風借雙翮
翻身入雲高帖天下陋蓬蒿去無跡五坊手擎海東青
側眼光透瑤臺層解條脫帽窮碧落以掌疾搥東西傾
離披交旋百尋袞蒼鷹助擊隨勢遠初如風輪舞長竿
末若銀毬下平坂蓬頭喘息來獻官天顏一笑催傳餐
不如家雞棚中生死守免使羽林春秋水邊走

李老峪山水深類先公墓田左右悠然白雲之

思

積翠發層巒恍然家山圖陰竇水屈曲古樹雲扶疎是
時月新出歸鴈飛躊躇疑我久離鄉問我今何如云昔
所種松靈籟吹笙竽總角守庭訓六籍師鴻儒幸以鉛
槧勤三入承明廬風景果有侶舉目諒不殊信美非我
土誓言敢終渝

偶成

午雷嬰兒聲晚月大士面頃刻備四時陰晴足千變空
齋韻重裘塵壁委團扇昔為居養移今愧筋骸倦

鼇峯石

劫風吹沫孕玲瓏度海鞭霆駕六龍聲合八音驚俗耳
重均九鼎動天空庭露冷珠璣綻阿閣雲開錦繡封
匝匝金蓮隨地擁侶催夜直佩琤琮

石下皆金蓮花

子規詞三首

不如歸去君家南山松萬樹我欲送君歸憐汝歲上灤
陽路

去不如歸江南春深筍蕨肥筍蕨肥子苦飢見子手持

一片冰下馬坐看白雲飛

歸去不如我是蜀王魄
化聲呱呱君不歸
請看錢塘雪浪千尺帆
踏歌起舞去復還

盧彥威與余同為待制下世已八年
覩行院題名舊跡感愴寫情

長髯黑髮佩鳴珂
嗜飲常持金叵羅
詩艷欲追長吉製
詞新深愛小蠻歌
鳳池聯轡情偏重
鸞鏡重粧病已魔
彥威再醺一題
日即病以終
僻淒涼悲二妙
元公近亦葬山阿

元復初學士舊歲同官集賢會于上都改除翰林學士見其飲酒數十觥倍常時今年以疾卒不起覩行院題壁為四韻以挽

慷慨論交二十年深慙經術荷推先龜趺林立毛雖禿
麟筆星垂汗簡傳直以曠懷招側目肯於凡品說齊肩
舊聞蘇李曾生別行院重來倍泫然

潘景梁學士同在集賢朝夕與余論宏詞源委
後俱罷去新政肇更皆得復入舊歲同會上都

景梁還都不一月下世僕忝入翰林過視草堂

有感

鑒坡清切平生志粉省烏臺謝不能

嘗除尚書行臺侍御皆不樂意在承

旨夜別蘭燈書葉亂凍呵鐵硯墨花凝蟻穿九曲誰傳
授蛭化枯枝果變騰欲說玄機吾豈敢碧天雲黯喚難
應

客舍書事八首

客景真愁絕淒涼倍舊年草穿沙戢縮雲住屋頭偏竈

冷厨烟濕窓低簷雷懸畏寒難出戶盡日得高眠

日永空庭淨清齋罷煮茶無羊誰閱市有客共思家
巷近逢歸馬門閒數過車衰年行六十那得老風沙

愁極吟肩聳塵深望眼迷屋隨冰上下山趣雪高低
乾酪瓶爭挈生鹽斗可提日斜看不足蹋舞共扶攜

蟾影穿窓矗龍光拂席流淒清三伏暑浙瀝九天秋水
惡停泥井冰堅宿瓦溝年年游上國那識望鄉愁

問俗過閭里淒涼說住冬凍瓶粘在手暖扇縛當窗雪急

蘧條響風高楫杌鬆寒更傳警夜飛騎急憧憧

禁堞防危石官衢漾淺沙犬能搜兔窟馬解避馳車童

剪青蔬甲僧分墨菊芽飄零堪慰藉小雨墊烏紗

宿霧成踈雨寒蓬捲細塵雲飛疑到地草長不知春香

几峰喧密寒房燕語真白頭關塞外猶作未歸人

燈影微微焰鐘聲隱隱清歸鴻天際度去騎月邊行久

客心無著微醺夢易成攬衣中夜起北斗正南橫

視草堂四詠

視草堂前月淒清十倍秋銀河斜處響玉斧暗中修隱
約娑羅見微茫顧兔流霓裳端可補頷入廣寒游

視草堂前雪飛花具四時老疑潘鬢重舞覺沈腰羸妙
合絲綸巧功調鼎鼐奇虛皇瞻咫尺頷賦玉京詩

視草堂前雨飛空萬象新隨龍下膏澤滌潁布陽春霖
霖能生物霑濡不受塵巫山空有賦難作楚王臣

視草堂前日傳宣趣制詞藁裁初刻上朝罷八磚移烏
御行黃道龍光映玉墀薰風生殿閣小立獨多時

華嚴寺

寶構熒煌接帝青行營列峙火晶熒運斤巧闔攢千柱

相杵歌長築萬釘

殿基水泉湧沸以木釘萬枚築之其費鉅萬

雲擁殿心團

寶蓋風翻簷角響金鈴隄知帝力超前古側布端能動地靈

贈華嚴長老二首

四年上國扈金輿燕處高齋得起予篋寶寸珠光不老
爐存片雪色相如抱琴有意傳流水擊拂無言指太虛

二十里松親見得塔中古佛白毫舒

華嚴洞下宗常游
四明太白禮宏智

塔宏智相傳
古佛再世

大室蕭蕭畫掩扉蒲團不下得忘機
階前菊本先春種門外楊花伏日飛
句落珠璣禪客誦象巖金碧梵王威
知余猶是青山伴話盡斜陽拍翠微

書邢導道二父家傳

蜚聲秀采動時賢書帙如山酒侶泉
已恨人間雙壁化共誇身後一變傳
藥囊有底陰功滿詩卷相輝盛事全

會見門楣成晚秀瀛洲委佩接羣僊

贈寫真佟生

丹青妍醜世間形碧眼看天畫未成夢覺已傳商相似
神閒能寫趙郎情沙塲燕領愁中樂客舍鳶肩暗裏驚
彩筆閱人頭漸白長因眸子識公卿

贈李道士

高安李道士貨藥繞灤城竹杖常隨手茶甌與解醒佳
冬饒活計聽雨話平生欲說前朝事年深記不成

行路難五首

桑乾嶺上十八盤
赫日東出紅團團
迴頭平田樹如髮
北去沙石何彌漫
青帘高低知客倦
勸汝一杯下前坂
馬蹄護鐵聲琮琤
帖石朱欄列危棧
度嶺林昏泊官驛
冰湧虛泥踰五尺
馬行猶知泥淺深
重車沒踝路莫尋
松林巨木官採搜
千斧斫根膏液流
翠旄離披仆巨壑
百谷震動狐狼愁
大車以載牛馬喘
歷歷塹深不能挽
車頭挂帟齊聲呼
一步一移日將晚
經春踰夏來京都

雕梁繡柱天人居錦茵花磚淺深護歲久不知行路苦
昔聞萬迴僧空中轉足如飛鷹又聞麥八百側徑迴旋
去無跡牙牌校尉夸快行急褰一日來京城人言脛中
有肉燕簫雲躡電那能名古云行路難今作等閒看君
不見明王坐朝疲心思日行天下人不知

金谷園頭土如酥瓊花琪樹凝流蘇文鴛甃磚藻影動
飛鳳團礎雲光腴紫絲步障三十里百和生香交旖旎
美人羅襪不動塵匝匝金蓮隨步起須臾急騎圍四隅

瞬息突兀生寒蕪綠珠危樓百尺墜行路之難却成易
敝裘蒙茸蘇李子兩足重趼行不已一朝佩印何累累
列鼎北邦夸國士班生遠出玉門關被甲夜度隨黃間
飛沙擊面燕領失晚望落日思生還書生守株燈火勤
終歲不通南北鄰一朝安車入關內老不能言願求退

賣薪行

老兵縛薪穿市賣雙手如龜布衣壞低頭望日南階行
背負槎牙北風殺大車輪困小車聚我薪不如一抔土

黃公壚前烟霧高揮手相譏不相顧暮歸置薪眠土屋
望月清歌聲斷續丈夫窮達會有時買臣懷章人始奇

視草堂歲久傾圯述懷二首

視草堂前草木青微臣三八鬢星星壞牆雨透蝸生角
舊竈泥深菌露釘深恐雨鍾催曉箭獨聽寒殿響風鈴
堂堂諸老冰漸盡病叟應歸種茯苓

昔時壽俊佩蹕蹕人物於今侶眇然倚馬誰憐才獨步
屠龍端信技無全頌冰伏日金奩重賜果薰風綺席鮮

可是虛皇䟽顧問玉堂舊事少人傳

翰林故事莫盛於唐宋聊述舊聞擬宮詞十首
禁鐘初動趣傳宣衣袖薰香到御前漸近宮門扶下馬
內官分引導金蓮

御筆圓封草相麻龍牋香透擁金花儀鸞勅設庭前候
賜酒方終更賜茶

制草塗鴉未敢刪內璫宣引侍龍顏已分筆格金蟾滴
更賜端溪紫硯山

春帖分裁閣分多宮娥爭餽纈綃羅青絲菜併銀盤送
幡勝新題墨旋磨

文思如泉涌墨林屏風院吏不須尋舊時內相諸孫在
猶有當年掃閣金

入院聽宣席未溫賜金已向案頭存
故事入院傳旨畢賜葉金十兩始草

制清晨上馬還家去內出黃麻付閣門

清馥香溫酒玉卮祝文已撰報都知夜來奉旨傳承相
五朶雲濃押省咨

天孫夜度玉潢清內托銀盤湧化生秋思未多團扇在
擬題宮怨月分明

盤鵬暈錦是冬衣鵲炭初生酒力微聞道邊臣風雪苦
口宣臈藥布皇威

贊書騰副節樓前筐篚盈庭邸吏傳深恨葫蘆陶學士
受渠犀玉索金錢

書懷

曉來重續避風簷午著輕羅更上簾可是炎涼隨世態

病多時節要抽添

五月二十日甘雨如注江南呼為分龍雨

平疇龜拆禱龍君百頃青黃兩界分
匝岸已霑三尺雨
隔溪唯見一川雲
誰家襪襪涼如水
此地祇裯火欲焚
共道神功有
南北老農元不廢耕耘

五月廿六日大寒二十二韻

地界幽都正風傳委羽來
陰機堅積沍空竅起荒埃
炎帝辭施設玄神擅展裁
氣疑翻溟滓勢欲壓恢台北戶

嚴雲結中街宿霧霾
睫流驚炙轂呻吟訝銜枚
野曠狐歸穴林荒雀下臺
趑墟人瑟縮走驛吏徘徊
舊篋裘頻索殘爐火易灰
當陽紈扇棄薄暮酒尊催
牛喘猶瞻月龍藏敢挾雷
曉吟肩峭直午睡髮毵毵
絺綌聊增韻簾帷莫浪開
鼎溫延上客竈煬集羣孩
烏認南枝宿駝鳴北路回
次寥河漢接慘澹雪霜堆
重甲身僵仆銖衣說詭誕
已知鄒子的更覺杜生哀
澤國朝曦赫畚田潯雨催
鴻鈞陶石爍金鑑煮冰推
舊俗慙卑窘新聞騁博該

廣寒今已到姑射不須陪

御天門聽詔

大樂出端門金龍日正暎千官齊跪聽萬姓列行屯親
衛周廬列王徯尺籍存侍臣頭已白宣室願陳論

露立

空庭露立意茫然簇簇飛雲萬馬旋擬變清涼成佛國
不教人喚四時天

喜吳宗師至

飛鶴馭空來春濃洞府開燈光爭夜月磬韻起春雷玉
斗朝雲禮金門就日回的知僊桂種玉斧更深培

食杏有感

筠籠賜杏得嘗新一一如拳醉臉勻準擬重尋舊門館
空庭繫馬燕飛巡

寄王繼學吏部

青春王吏部東閣久相陪聽雪聯詩送看花並轡迴如
何千里別不寄一書來拂拭題名記深知吐鳳才

皇城曲

堂堂瞿曇生玉宮幼年夙悟它心通梵書未覩口已誦
底用城闕窮西東淨居老人幻境異故作恐怖生愁容
世間習妄了莫喻要以神化開盲聾歲時相仍作游事
皇城集隊喧憧憧吹螺擊鼓雜部伎千優百戲羣追從
寶車瑰奇耀晴日舞馬裝轡搖玲瓏紅衣飄裾火山聳
白傘撐空雲葉叢王官跪酒頭叩地朱輪獨坐顏酡烘
蚩氓聚觀汗揮雨士女簇坐唇搖風人生有身要有患

百歲會盡顏誰童西方之國道里通至今生老病死與
世同

天童山圓上人遠來開平訪華嚴以舊詩求題
三尺枯藤一卷詩五千里外訪相知鄉音未改眉毛在
曉過嶺西聞子規

手探驪珠顆顆圓清如秋月獨當天舊樓太白寒禁得
更上開平擬過年

題信上人手書

南湖涼觀碧芙蕖
屢見臨池曉日初
一去天台隔生死
重來應寫梵天書

客舍四詠

膚寸出巖遲亭亭大雅姿
肯因風共去獨與月相隨
似絮飛無著如山立不移
崑岡有片玉歲晚話深期

孤雲

寒燄出房微前山尚落暉
酒醒光耿耿鐘定影依依
蝶夢疑方化螢流竟不飛
廿年長作客獨照合玄機

孤燈

舊日江湖伴多因塞北分身單
追暮雨翼冷帖秋雲肯

向蘆邊宿還應枕上聞沙洲增綠滿不是故離羣

孤鴈

絕頂看秋月星沈萬象奇難隨黃鵠侶獨與白雲期野
性便金洞清聲徹玉墀山中王子過時一聽參差

孤鵠

次韻圓上人

大荒沙漠境全真平楚天低絕見聞此處無愁誰會得
琵琶一曲問昭君

我家鄞水望江神君住鄞山半嶺雲同向天涯作行客
定知猿鶴有移文

萬斛千言任所之一花五葉總牟尼九龍峯鎖難分別
會見芙蕖長玉池

次韻華嚴賀李彥方除監察御史

秀采寒光敵楚金詞鋒能繼九州箴鳳池舊直驚人海
烏府新除表士林甄紹家聲真素業簡騰民瘼是丹心
華嚴蓮社相期遠應許遺民得共尋

彭法師禱雨有感

神京歲歲春秋交乾風捲塵喧四郊銀潢清寒不可挽

火礫燥露焚鳥巢廟堂憂惶走羣望桂酒跪瀝陳牲餼
飛雲虛無恣強魁古澗偃蹇專幽蛟蜥蜴旋舞破甕缶
髣髴龍作形靡藁焚或夸巫言擊長劍或騁梵語鳴銅鏡
老彭之孫赤松派尸坐直欲鴻濛包深知天水本一炁
山澤妙感窮羲文三玄上章給鳳札九淵投簡驚蛟綃
大青小青各受令旋轉急注搜巖坳初疑飛縉蔽雲頂
恍若銀竹穿林梢鳥衝沈冥舊栖失虎度泥淖前林咆
迺知至道在瓦礫芒刃不缺湏良庖皇皇真宰燭萬類

神運溥博民同胞前驅招搖後玄武朱冠鐵騎森旄旂
精誠相通顏咫尺聳聳未識徒譏嘲白頭太史詎妄記
願以彩筆窮模描

近為盧真人作桐柏山賦以舊賢四詠復令賦
詩次韻

雙闕高蹲僊境分深留絕頂獨耕耘雞啼流水村非遠
犬吠隔溪人始聞翠萼滿林俱上藥黃雲封戶總回文
層霄笙鶴須臾見不用談空李少君

王子乘鸞八極周參差次徹此淹留緱山未信雙輶遠
滄海端如一羽浮碑聳蛟螭擎雨露賦鏗金石閱春秋
莫言劉阮歸無跡政與寒巖二子游

遠瞰神山接海潮羣峯匝翠周遭漆書舊字開蒼蘚
金鼎寒光映碧桃瀑濺花香疑過雨風回松吹乍驚濤
昔年曾說王靈寶冷笑人間有二毛

雷起平田過雨腥居民猶說老龍靈泉流洞口凝鍾乳
月落松間照茯苓琴罷忽驚人換世丹成深勸客延齡

僊翁久作朝元客贏得瑤壇滿鶴翎

再次韻

門首穹碑字八分寸田尺宅勸鋤耘雲歸右洞疑無著
雷過前山侶不聞磨石旋風空世劫梭溪織水起寒紋
年年秋月層臺上髣髴虛無下帝君

堂堂王子憫宗周不住緱山此地留玉髓定將金篋貯
滄波能使羽觴浮絳桃帶雨飄紅雪翠樹停雲起素秋
絕頂銀盤宮闕爛不須更向紫霄游

夾山松瀑侶秋潮老鶴調雛日一遭欲與雙成同勸酒
却嫌方朔強偷桃草沿碧澗千年藥雪釋瓊城百尺濤
聞道玉蟾三度到通明金骨舊皮毛

玉蟾或云在羅浮未化

久食青精厭世腥無心折草總通靈望雲岸幘招歸鶴
滴露濡毫傳負苓峯頂丹成真九轉洞中棊罷已千齡
嗟余猶是征塗客四上開平數鴈翎

上上人游開平回四明

圓帽方袍上上京看山碧眼雪分明南來白鴈先秋去

我輩無情合有情

成君輔廣濟堂

車馬填門日不停
刀圭上藥已通靈
應須重作鐵門限
坐見堯民壽百齡

內宴二首

寶勒猩纓鴈翅屯
錫鑾款款奏南薰
珠冠聳翠千行列
雉扇交鸞五采分
宮漏解留黃道日
御爐能接紫霄雲
漢家天子空英武
置酒爭功始考文

梭殿沈沈曉日清靜鞭初徹四無聲桐官玉乳千車送
酒正瓊漿萬甕行肯以駟峯專北饌不須瑤柱詫南烹
先皇雄畧函諸夏擬勝周家宴鎬京

伏日

伏日車中閉炎蒸不自由轉旋疑病酒掀簸似驚舟山
色隨時轉溪聲著耳流艱難吾敢讓猿鶴故山秋

龍門

君恩八度過龍門眼見蜿蜒守黑雲漠漠沙田荒礫滿

空將霖雨一溪分

巨靈何日擘雙門千古英雄底死論落日碎金寒澗裏
銷磨猶是僕姑痕

戲題開平四集

開平四集詩百首不是故歌行路難竹簟暑風茅屋下
它年擬作畫圖看

奉題開平百首詩後

王士熙

玉海雲生貝闕高騎鯨人去採芝遨灤江一夕秋風到

瑟瑟珊瑚湧翠濤

清容居士集卷十六

欽定四庫全書

清容居士集卷十七

元 袁桷 撰

贊

劉敏叔畫八君子圖贊

五季橫潰萬姓阻傷剗舊布新赫日蕩光變通維時君
臣爾詳丕顯韓王應運斯翔佐帝立極肇服衆國銷兵
弛財邦本茂植獨相十年黎獻安謐弼違雍容不撓厥

色百壬肆妖喬嶽漂搖智深如谷終止且消金滕天開
軒冕以朝簡在帝心王勲日昭燕尾之眉貫玉之姿炳
靈丹青庶或類之

右韓王

堂堂魏王龍章鳳質天實生之以佐王室射策玉墀慶
雲耀日中外踐更執德惟一西陲繹騷將弛卒驕往綏
爾戎薄陳武韜濯以清泉釋其煎熬入東國釣衆味畢
調不懼不渝迄康皇圖取日虞淵登于天衢朝野罔知

繫王明謨危疑之際以身調娛西宮熙熙萬姓于于桓
圭赤舄清廟配食於饗厥勳千古罔極

右魏王

赫赫潞公不震不動威以服戎寬以濟衆宏淵雅譽磅
礪肆著蚤年登庸具正百度貝盜斯興命公於征振旅
霆發不日以平國財未殫抗議省兵激懦抑貪朝廷清
明以德報怨以爵為勸強敵効貢却立改觀名倡九牧
進善無倦四朝師臣邦家之珍委蛇兩河如松如椿燕

領淳龐鮑背輪困何以比之永古蔑聞

右潞公

儒以稽古酌時斯正用非所宜祇益其病在漢懿侯治
守清淨惟爾荆公行修於躬耽精古籍慨想遐風懷寶
陸沈患莫已逢激而翹之以達天聰高配五帝羞視七
制廷議藉藉斷以辯毅復古之志與帝俱銳發政累名
公是喪朋晚歸鍾陵惆悵慎兢震驢空山悟彼愛憎矯
矯貞姿涅而不緇吾將疇依為學是師

右荆公

帝宇永清文治斯舉取青姬白眩巧闢嫵末派橫流獨
手莫禦弊極斯反誰受天祐薦生歐公鴻碩之宗鼓以
雷霆驅以雨風如日之明如川之東肇正古始四方攸
同獎善矻矻英俊滿席彼有未至憂見於色補袞之功
其繩則直以退為完以供為安高風邈如審象以觀

右歐公

任當其誼三褫無畏用不展志好爵斯避允顯溫公為

世張弛執中秉德享帝活國熙豐紛紜朝有奸慝歸卧
洛師纂緝載籍元祐之初大矢厥謨稂莠既深百穀未
數畀成於天力疾以除佐佑王室公心如日獨樂之園
以迂自佚生無榮養歿有餘泣深衣幅巾天骨嶙峋中
有至道不以示人唯誠與敬千載如新

右溫公

岷峨之山扶輿綢緼誕育至英絕類離羣溢為江河乘
為風雲高絕俊穎探賸炳文承明邇英紬思運精騁轡

以行華夷是驚蹇蹇匪躬上通帝靈才以貶官謗以長
名播遷徼荒百虐寇攘繕性養神彌介彌剛盤桓南歸
百神從行誰謂巨浸一葦以航瞻彼德容春陽秋霜烟
然方瞳如犢初生霄雲戕戕野服蒼蒼徃代莫從鑒茲
耿光

右蘇公

云云修水誕弘文明維太史氏穎敏之功由彼歧嶷揚
譽上京服襲瑰瑋綜覈文藝剖析幽翳謝鮑前驅屈宋

擁篲玄言逍遙夙昔超詣正宗江西歛衽嗣裔廁身著
庭正氣果毅筆者未成削者已繼秉畀濁流孰怨孰尤
不怛其化心君天游精神滿腹瞻望不足烝烝孝友猶
在眉目清塵高風曷其有終

右黃太史

祝道士龍贊

靈砰砰三五一視若存水神立玄為光高原粒天門開
靈受秩

墨竹贊二首

墨以韜智玄以御柔渰焉雲興脫兮凜秋寥寥天標下
為岩堯執茲混淪函三爾超乘剛庸升實志勿驚比焉
彙亨烝徒繩繩纚者如偃若佩而組墨卿司玄騰汝於
堵

予昂集賢真贊

審中聲以比磬箭之音證墜簡以啓載籍之蘊承明三
入而不居江海一麾而無愠遺世而深憂盡言而寡尤

瓌瑋萬物金石橫流敷文太微慶雲瑞芝超然巖壑寄
於筆翰者吾猶以為杜德機也

張廣微金書陰符經贊

遐哉古帝握契眇綿沌沌混混超天地先執靜御動茲
為坤乾虛九藏一書圖歿鈐範圍包絡佐理密堅氣母
受要納息以傳泥金著文其璿玄玄鋒淬穎脫乘雲大
圈

雲中龍贊

握玄機騰八荒
懺雲中閣以彰九九
合下土光返珠淵
終智藏

龍贊

御乾入坤萬靈嫖姚止
水飛立迴旋上朝神后
布令蘊隆默逃功成返
淵重玄以韜

又

玄雲噓氣為母騰靈湫
匿星斗握以機數九九
百穀蕃歲大有

太上授經圖贊

混元希夷空洞眇綿方圓緯經言孰可宣憫彼世醜述
玄五千紫雲升空重席九筵跪坐受聽萬神參前研幾
察微如珠善淵德為之初道迺自然

辛稼軒畫像贊

妖雛殂江八方沸騰手提糲糊仗義南興閩越荆湘是
鎮是繩智名勇功蔑如浮雲讒屢尼之耳若不聞聲裂
金石湛厥心君運有南北孰言一之時有未完矢詞室

之卒全其歸莫能躋之帶湖維居喬木鬱新目光背甲
佩兮振振審象式瞻宛其不泯

仁廟御書除官贊

於赫仁考御龍中天追琢王度左右惟賢思索俊髦嘉
量達權稽古九官匪曰叙遷嚴嚴秩宗維直且清佐理
大政宰士是程皇畿撫穰具瞻靡輕率彼緇流出納糾
繩八柄馭臣首爵以貴或超或常執管淵思昭哉雲章
銖黍莫置勿私以恩不悅其媚番番老臣卒秉國鈞山

立陽明如歲之春帝賓於天執簡涕淪虹光徹楹萬億
日新

至治丞相真贊

以元勲開國之孫佐大明麗天之主肩一德以正人心
集衆思以清庶務玉絜而彌溫山立而有度審象以觀
斯為太平之宰輔

又

階符耀騰河嶽炳靈寔生上相秉鈞以成儼兮德容衮

衣蔥衡山立其威玉絜其清陟降帝所翼翼是承帝曰
相賢佐我治平雲龍從類鼎鉉利貞懋昭顯功象於丹
青於赫寶璽虹光爛明用永厥藏詔爾雲仍

英廟御書開經偈贊

時為皇太子

日升咸池五采耀騰昭徹水源濁垢斯澄維彼寸穎執
一貫萬鉅纖受形莫測其變驪珠陸離光被寰海允符
龍圖昭示億載

自贊

幼承父師之準繩壯緝文獻之淵懿守先天之中為初心究三聖之易為一致氣弱而詞愈卑學疏而用益疑寥寥兩京耳受目接者不能紹傳吁何可言

王承旨畫像贊

於赫乾運天造耆武肇敏王公粲飭皇度越於江濤率圖籍以朝秉直在庭不激不雕矢舜瓊琚風舒霰消益之以甘雨濯其嘉苗佐理髦思敷繹靜規民甫息瘼勿煩以疵懿德汙汙如山出雲有聞無聲爰澤後昆珮玉

我冠審象是傳之問之美百世弗諼

王叔能真贊

心清而行全守廉而益堅不汲汲於利達專丘壑以自
完若是者五采不能以傳至若炯炯方瞳藹然孝悌之
實發於眸容人知其為臺閣之秀彥蘊經綸而猶未盡
其用者也

自贊

訥文詞而三直承明之廬拙騎射而五游朔漠之域居

安以窮犧爻之變比事以糾麟經之釋至於見幾歸田
服恬淡而守貞白識者謂為知止而獨慊然猶以為有
形迹也

馬元帥真贊

養恬而智無遺息機而事能應贊黃閣弗居其功坐烏
臺獨守其正制變於劇郡若郢人之斤鎮戎於大藩若
秦王之鏡服芝朮以養年將見安車造朝守規隨而樂
清淨也

瑞檜贊

老子之道以恬泊真靜為根本而其嚴靚清密非窮極壯偉不足以為榮觀故所至丹雘土木與浮屠氏相埒殊庭廣寬候靈存於致祠之際尤加嚴焉四明玄妙觀構寶殿倣南城之長春法式具備主者呂法師顧瞻中唐作而曰茲不可不加竦肅手植蒼檜列若幢節厥土墳剛風潤雨濡膏脉日起旁達翳鬱連累相承泰定三年春正月中澣上聳結為鳳冠觀者林立考諸釋檜者曰

乍檜乍栢一枝而能屢變唯檜為然觀是則知釋者之
非妄矣或曰厥今聖天子嗣位歷更上元洋洋乎盛德
覆被動植疊瑞重休四方承畏不敢以獻以告而祝釐
儲祉道家者流有所不得辭讓迺繪為圖以光天之休
為之贊曰

緊檜在廷三光炳靈膏涵於膚湛其晶熒化為鳳雛珥
冠儀刑乘風鞭雷上於帝青曰有德者祥茲為利貞爰
祝萬壽九垓永寧

雷氏龍吟琴贊

為閔思齊作

四田八日用凝於神攫之也深養之也淳風生於木莫窮其聲比物引類錫茲嘉名杳杳變化雲升雨澍曼如銅盤茲其為作者之助

吳閒閒真贊

德不形禮為翼熙冲靜之神侃侃孝友之色籠古絡今其詞如雲佐理以無為智淵而若存朝承袞龍暮撫松鶴心徹九九坐石盤礴是所謂養其尺宅守玄以生

白者耶

仰山熙禪師真贊

蜀僧曇簡以文詞振林下繇是東南學者翕然師之
育王觀禪師才辯繼其學弟子熙公復繼之有詩名
鳴咸淳間試嘉慶圖詩禁中定為第一余獲見於淨
慈植節刻行言語若冰雪欲以蜀學廣其徒後歸隱
仰山以逝其嗣隆教師祖瑛以遺象從海上請余贊
迺為贊曰

心之精神繇言以宣匪事琢雕合於自然維師集思泉湧雲溢億萬森列復貫以一蜀學日淪志士是惜瞻彼肅容以楷以式

南湖入法師直贊

目穿書林心超義海體用不違功斯十倍審多歧之亡羊悟忘筌以得魚追琢其詞不浮不蕪外嚴內熙蕭然野鶴之姿斯其成祖庭之羽翼絕塵世之樞機

定水源禪師真贊

持律以攝心習教以騁辯語默兩忘微旨益闡薄飯一
孟福不稱其德至於據席握機颺回雷激誠禪林之準
式也

雪厓吳法師真贊

雪厓吳法師飭身制行道流所尊企弟子呂虛夷請
贊

長齋以養年持敬以籲天若雞抱鵲如珠守淵望之山
林即之珪璋知止葆靜合太古之淳厖夫如是逍遙乎

白雲之鄉

箴

存悔箴

天君亭亭巖石永貞執樞維機莫我敢膺鈞聲割名如
蝨如螟微焉髮毛戰兢是承謂善實繇小而過不在大
雷以鼓之艮以配之合動而復繇靜斯會昔顏氏子悔
實莫可名筮人司蓍敢告司局

遵誨堂箴

肅肅祖父誦戒孔昭亶惟矩衡匪矜匪惱式瞻里門養
真簞瓢何裋題爰棄肆其夸驕金縢玉毀迄用不紹巷
有居人燕叫曾髻右觴左饌以遊以遨何白首高位顧
影號咷伊堂既深亦具室與偃躬徐行慨焉焄蒿戶冊
崇崇陟降以悚於乎後生勿夢夢是從爰繹具訓敢告
嗣宗

貞一齋箴

昭哉森著鉅纖受形順天之樞執動以承尸居者誰不

震不隨謂珠藏於淵主靜是師太虛無體曷思曷為聚
為物均散為返真由感以遷若火之燎原在昔夸父逐
日走偃鑒觀河圖繇是成數成復捨之厥數愈具庶物
湯湯若冰斯泮固而斯應迺事之幹絕仁棄智望道彌
渙必寂爾心必完爾神益人司易敢告靈君

誠求堂箴

肫肫者仁婉婉者孺彼孺不言容動斯具以食為喜以
啼為怒感匪物遷孰司昭先黜思絕為迄全其天揣知

者誕矢激滋遠順陰保陽若執玉以裸太素烟煴至靜
無垠見之猶龍望之如雲猗儒守醫曰曾氏子言邁于
京戶冊是視

銘

復菴銘

弁陽老人周公謹父卜終老之丘於先中丞公墓左築
室其上揭名曰復庵謂其故人子袁桷曰復反也反諸
其本也聖人作易之義深矣余取斯名也厥有旨昔太

公表東諸侯歸葬於營丘禮以謂不忘其本余家故齊人雖南徙吳興而其遺禮三世猶守之自余失仕居錢塘非有酣豢之樂而忘其歸不幸而不得歸者勢也今老矣苟終無所歸則於沒之道奚取抑嘗推死生晝夜之理其變無窮反身而觀虛一而明者物莫能禦則茲丘之樂殆與造物者去來而莫窮其所止也予為我暢繹而銘之銘曰

大明麗天隱於崑崙晦冥有時以全其根海氣騰溢為

雲為澤吐奇滋生復反故壑嗟彼昏氓睢睢涼涼齒髮
日化莫知其鄉馳車羊腸倒戈蟻垤少夸老衰運往一
跌維子周子心君天游顧瞻松栢肇謀菟裘峯迴泉渟
虎伏馬立鬱為斯丘不龜以吉煌煌先德如珠在淵既
揚其輝終閔其妍盤桓斯丘豈不念歸三返晝夜以為
德機伊復之道其微如芒磅礴一氣變化以彰原本稽
中是則是象謹獨內觀動靜交養他年逍遙駕風御雲
匯為江河炳為星辰其來無趾其去孰止為善是嗣貽

於孫子

君子齋銘

大裘無華完玉不琢飾美自將其實愈落善不可為名
不可近恕以養仁敬以崇謹謂我獨賢於德彌損八表
同雲一決終債謂世實賢睢盱孔憐肥遯斯耻却行乃
前人我之道弭節兩忘汝不我瑕我不汝望煌煌嘉名
揭茲戶冊希賢是求探蘊觀蹟盤旋九州俯仰千古發
硯淬鋒門轍戶屢君子之泰君子之和永言銘之以宴

以歌

澄心齋銘

大梁劉君彥清佐鄞幕清淨畫一希蓋公之道逾月而
治愈簡及暮而人莫能議噫使佐天下由是道也果何
病今世汨汨然外治者多矣神明粹精交蔽而愈失其
於內也蓋不暇夫虛明之體絕慮而求者非正或者謂
老氏之說近此因屏不復取今劉君以澄心名齋動靜
交用有合於聖人之說四明袁桷因銘以廣之

存神內觀形不能以久完刻意外治氣由是而彌衰水
煩土敝維物之灾人為物靈其道安在內不可穢外不
可悖湛然長存於物何類故操尺寸之智者成尋丈之
失勤錙銖之功者獲倍蓰之益御天地之一氣持陰陽
之兩端吾見其清而不介絜而自全也

雪房銘

錢塘孫道士構雪為房居江南度不能久得北如京師
將遂焉久之復越居庸以游始固有之迺屬素桷銘銘

曰

養絮沮如其變莫渝納明屋漏其神莫究執天之宜允
成德機機可轉不可緩緩則懼懼無以據窮髮之北以
儀以則爰謹視之毋怠毋惡

崇真觀鐘銘

治古金構坎離為氣用震以時深則安安迺旋鎮無極
億萬年

朝陽堂銘

焯彼曜雲光融曲阿翼翼玄黃粲其鬱華
究觀厥功構精沈淵若覈斯伏若珠斯潛
內陰以藏外遲以進含施無垠執斗憲運
衆瞻嘉明企而則諸言升于岱昏旦允殊
丹流金騰下土若昧竦心惕思怠曷可悔
嗟哉夸父競不救暵大聖維姬慎茲明發
爰興爰處寸測短長少耄勿荒永儀朝陽

藏書室銘

六學鴻烈代天昭明精思纂微辭以立誠
匪事於言不

文奚宣析理日繁直致衍傳謂默足以通絕其知聞敬
焉孰持誠焉孰存趙郡氏蘇崇其書楹剖抉雲章緯經
有程靈根湛虛服習粹精廣以觀萬約以守一迎之莫
尋倚芳不躋仰止元聖學海彌溢

極高明齋銘

謂天穹隆環於九泉謂日陽靈始於虞淵邈焉具瞻荒
忽漫漶銖黍立鈞億萬以正行遠陟遐跬步攸定維先
聖彛訓大賢是證理一分殊等級辨分不博以求孰為

彌綸不約以觀孰歸其根積小斯高用晦斯明罔有僭
差是準是繩戶冊孔昭爰矢厥銘


九思堂銘

虛中實中圖書之紐實以分殊虛以一受理原於初思
曷為九於赫玄聖分言為中上由體生下應景從維李
氏子受訓倥侗戶冊孔昭執玉靡墜數窮於玄陰陽以類
則皇極之言罔有偏陂

淵靜齋銘

為蒙道
士作

猗鉤盤審鯢桓蜀吏蒙拱以觀恢無極視晏然默雷聲
守綿綿珠在宮百神環時既至乘風搏



清容居士集卷十七